

IN MEMORIAM

Nihad Kapetanović *

Fadil Hodžić, ing. geodezije



Nakon kraće bolesti 05.06.2007. godine preminuo je u Sarajevu naš uvaženi kolega Fadil Hodžić, ing. geod. Dženaza je obavljena u prisustvu velikog broja rodbine, prijatelja, komšija i drugih poštovalaca, a sahranjen je na gradskom groblju Vlakovo.

Fadil Hodžić rođen je 02. 08. 1937. godine u Podgorici, Crna Gora, gdje je završio osnovnu školu. U toku 1948. godine doselio je u Sarajevo, gdje je nastavio školovanje. Nakon završenih šest razreda gimnazije upisao se u Geodetsku tehničku školu, koju je uspješno završio 1960. godine.

Nakon završetka škole zaposlio se u Republičkoj geodetskoj upravi u Sarajevu. Po dolasku iz JNA zaposlio se na istom mjestu, ali u Geodetskom zavodu koji se odvojio od Uprave. Odatle na

kratko prelazi u preduzeće Geoistrage, da bi 1964. godine prešao na Šumarski fakultet u Sarajevu, gdje radi kao laborant na predmetu Geodezija. Integracijom katedri za geodeziju Šumarskog i Građevinskog fakulteta 1968. godine postaje radnik Građevinskog fakulteta, gdje ostaje do penzionisanja 2005. godine sa prekidom od jedne godine (1981.-1982.). U tom periodu radio je u RO PTT Inžinjeri Sarajevo kao rukovodilac geodetske grupe.

Višu geodetsku školu pohađao je vanredno uz rad od 1971. do 1973. godine i uspješno završio. Nakon završetka te škole postavljen je na mjesto stručnog saradnika na Odsjeku za geodeziju Građevinskog fakulteta. U 43-godišnjem radu u geodetskoj struci radio je na raznovrsnim geodetskim stručnim, visokostručnim i naučnim poslovima. Veoma uspješno je rješavao zadatke za privredu kojih je bilo veoma mnogo: različita snimanja sa izrdom plana, mostovi, klizišta, oskultacije brana, fotogrametrijska snimanja i drugo.

Koautor je pri izradi Studije o ispitivanju deformacija terena u gradu Tuzli geodetskim metodama, Studija o ispitivanju deformacija terena na rudniku soli Tušanj geodetskim metodama i Studija o ispitivanju stabilnosti izvoznog i ventilacionog okna rudnika kamene soli tušanj u Tuzli za dugi niz godina. Sve pomenute studije štampane su u izdanju Građevinskog fakulteta u Sarajevu. Kao autor i koautor učestvovao je u mikrotriangulacionim i nivelmanskim mjerenjima.

Autor ili koautor je šest stručnih i naučnih članaka objavljenih u časopisima Geodetski list Zagreb, Vermessungstechnik Berlin i Geodetski glasnik Sarajevo.

Bio je član Saveza Geodetskih inženjera i geometara SRBiH gdje je vršio funkciju predsjednika Izvršnog odbora i člana predsjedništva SgiG BiH.

Od 1987. do 2005. godine bio je sekretar uredništva Geodetskog glasnika kojeg je veoma uspješno i estetski dotjerano pripremao za štampu.

*prof.dr.Nihad Kapetanović, dipl. ing. geod.

Nosilac je niza priznanja od koji posebno treba izdvojiti:

- Orden rada sa srebrenim vjencem 1980. godine,
- Povelja o izboru za zaslužnog člana Saveza Geodetskih inženjera i geometara Bosne i Hercegovine 1981.godine,
- Povelja Građevinskog fakulteta Univerziteta u Sarajevu povodom 35-godišnjice rada Fakulteta u znak posebnog priznanja za izuzetne zasluge u radu i razvoju Fakulteta 1985. godine,
- Spomen plaketa grada Sarajeva povodom 40. godišnjice oslobođenja Sarajeva za doprinos u ukupnom razvoju Sarajeva 1985. godine.

Fadil je bio čovjek koji je sve aktivnosti obavljao savjesno i sa mnogo volje bilo da se radilo o stručnim radovima, poslu oko izgradnje kuće, vikendice, sportu (bio je aktivni nogometaš, skijaš, i skijaški sudija) ili druženju sa prijateljima i kolegama.

Posebno bih želio izdvojiti Fadilov vrlo skladan porodični život. Uz mnogo odricanja, zajedno sa svojom dobrom suprugom Eminom, odgojio je i pružio najveće obrazovanje kćerki Elzeti i sinu Edinu, koji su mu uzvratili na najbolji mogući način. U svojim strukama su veoma uspješni i cijenjeni. Podarili su im i troje divnih unučadi, unuke Lanu i Tianu (Edin) i unuka Matthisa (Elzeta).

Teško je opisati i rastati se od prijatelja i saradnika kojeg sam poznavao 50 godina!

Naš dragi Fadil uživao je poštovanje zbog svoje stručnosti i radinosti, prijateljskog odnosa i otvorenosti. Zbog tih osobina sačuvat ćemo uspomenu na njega u svojim mislima i svojim srcima.

Izgubili smo dobrog čovjeka. Neka mu je hvala za sve što je učinio.